

DAGING

PINAKA BANTANG AWIG-AWIG DESA PAKRAMAN

PUNDUKAHA KAJA

Murdha Citta	ha
Daging pinaka Bantang Awig-Awig Desa Pakraman Pundukaha Kaja	na
PRATHAMAS SARGAH : Aran lan Wawidangan	1
DWITIYAS SARGAH : Patitis lan Pamikukuh	1
TRITIYAS SARGAH : Sukerta Tata Pakraman	2
Palet 1 Indik Krama	2
Palet 2 Prajuru Desa	5
Palet 3 Indik Kulkul	8
Palet 4 Indik Sangkepan lan Paruman	9
Palet 5 Indik Druwen Desa	11
Palet 6 Sukerta Pamitegep	12
Kaping 1 Karang lan Tegal	12
Kaping 2 Kakayon	14
Kaping 3 Indik Wawangunan	15
Kaping 4 Indik Wawalungan	15
Kaping 5 Indik Bhaya lan Dusta	17
Kaping 6 Pangunyan Banjar	18
CATURTAS SARGAH : Sukerta Tata Agama	19
Palet 1 Indik Dewa Yadnya	19
Palet 2 Indik Rsi Yadnya	23
Palet 3 Indik Pitra Yadnya	23
Palet 4 Indik Manusa Yadnya	28

Palet 5	Indik Bhuta Yadnya	29
PANCAMAS SARGAH	: Sukerta Tata Pawongan	31
Palet 1	Indik Pawongan	31
Palet 2	Indik Nyapihan	34
Palet 3	Indik Sentana	36
Palet 4	Indik Warisan	38
SADTAS SARGAH	: Wicara lan Pamidanda	40
Palet 1	Indik Wicara	40
Palet 2	Indik Pamidanda	41
SAPTAMAS SARGAH	: Nguwah-Nguwuhin Awig-Awig	43
ASTAMAS SARGAH	: Samapta	43

PRATHAMAS SARGAH
ARAN LAN WAWIDANGAN DESA

Pawos 1

- (1) Desa Pakraman puniki mawasta Desa Pakraman Pundukaha Kaja.
- (2) Jebar kakuub wawidangan mawates nyatur sakadi ring sor:
 - ha. Sisi Kangin : Desa Pakraman Bunga Mekar;
 - na. Sisi Kelod : Desa Pakraman Bunga Mekar;
 - ca. Sisi Kauh : Desa Pakraman Sakti;
 - ka. Sisi Kaler : Desa Pakraman Sakti.
- (3) Desa Pakraman puniki kawangun antuk Karang Desa miwah gebogan Krama, gilik dados abanjar kaapah dados 2 (kalih) Tempekan.
 - ha. Tempek Kanginan;
 - na. Tempek Nyuhungan.

DWITYAS SARGAH
PATITIS LAN PAMIKUKUH

Pawos 2

Patitis Desa Pakraman sakadi ring sor:

- ha. Mikukuhang mwanng ngrajegang Sanghyang Agama;
- na. Nginggilang tata prawertining maagama;
- ca. Ngrajegang kasukertan Desa saha pawongannya sakala lan niskala.

Pawos 3

Desa Pakraman ngamanggehing pamikukuh sakadi ring sor:

- a. Pancasila;
- a. Undang-Undang Dasar Negara Republik Indonesia Tahun 1945;
- a. Tri Hita Karana manut sadacara Agama Hindu.

TRITIYAS SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Warga Desa Pakraman inggih punika sahananing jadma sane maagama Hindu, jumenek ring wawidangan Desa Pakraman, satinut ring daging Awig-Awig, Pararem Desa lan pamargin Desa Pakraman.
- (2) Sane kabawos Krama Desa Pakraman, inggih punika Warga Desa sane sampun marabiyani, ngamong wiyadin tan ngamong Karang Desa, nyungsung Kahyangan Desa, tur satinut ring daging Awig-Awig lan Pararem Desa Pakraman.
- (3) Jadma sane mawed saking Desa Pakraman, nanging magenah ring Dura Desa kangkat sareng makrama Desa, swadharmanya kamanggehang manut Pararem.
- (4) Sajaba sane kabawos ring Wiwit (1), Wiwit (2), lan Wiwit (3) ring ajeng kabawos tamiu. majalaran antuk:
 - ha. Malelungan;
 - na. Sasudian Desa utawi Guru Wisesa;
 - ca. Ngarereh pangupa jiwa mwang larapan sane siyosan.
- (5) Tamiu kaapah dados 2 (kalih) luire:

- ha. Tamiu sane maagama Hindu: Prade sampun jumenek ngantos 35 (sasur) rahina patut katedunang makrama Desa, sajawining sang kasudi olih Guru Wisesa;
- na. Tamiu sane maagama siyosan: prade sampun jumenek ngantos 35 (sasur) rahina, kapatutang naur jinah pasuka-duka manut Pararem.

Pawos 5

- (1) Swadharmaning Krama Desa patut keni ayah-ayah sakadi ring sor:
 - ha. Krama ngarep ngamargiang ayah Krama ngarep;
 - na. Krama pangele ngamargiang ayah Krama pangele;
 - ca. Krama kaputungan ngamargiang ayah Krama kaputungan ngantos mayusa 60 (nem dasa) warsa.
- (2) Anak-anaking Krama sane sampun munggah Daha wiadin Truna patut ngamiletin Sekaa Truna, tur kaangkat ngamargiang ayah-ayah Krama.
- (3) Sahananing Krama patut sungkem ring tatiwak saking Guru Wisesa.

Pawos 6

- (1) Peson-peson mwang urunan Desa sakadi ring sor:
 - ha. Krama ngarep keni peson-peson miwah paturunan mamungkul;
 - na. Krama pangele keni urunan lan peson-peson satenga saking Krama ngarep;
 - ca. Krama kaputungan keni peson-peson pateh sakadi Krama ngarep ngantos mayusa 60 (nem dasa) warsa, salantur ipun patut luput sahananing peson-peson.
- (2) Prade ring Desa wenten pakaryan sane abot, patut karombo antuk Krama lan Warga Desa sami.

- (3) Prade wenten Krama tan nganutin sakadi ring Wiwit (1), Wiwit (2) wenang keni pamidanda manut Pararem.

Pawos 7

- (1) Swadharmaning tamiu patut ninutin pamargin kerta lan tata kasutreptian Desa Pakraman.
- (2) Krama sane ngraksa tamiu patut matur supeksa ring Prajuru Desa tan kasepan ring awengi.
- (3) Tamiu sasudian Guru Wisesa sane jumenek ring Desa Pakraman ngantos 35 (sasur) rahina kakeninin punia nyabran wenten karya, utawi piodalan ring Kahyangan Tiga.

Pawos 8

- (1) Krama sane polih laluputan pamargi utawi ayah-ayahan luire:
- ha. Para Pamangku Desa;
 - na. Prajuru lan Pacalang Desa;
 - ca. Krama sane cedangga banget utawi sungkan tahunan;
 - ra. Krama ubuh utawi Krama tapukan sadurung mayusa 17 (pitulas) warsa.
- (2) Laluputan inucap maundadika sakadi ring sor:
- ha. Para Pemangku luput ayah-ayahan, peson-peson miwah urunan;
 - na. Prajuru polih luput peson-peson reramon kewannten;
 - ca. Krama sane cedangga banget lan sungkan tahunan polih luput manut Pararem;
 - ra. Krama balu Istri luput ayahan Lanang. Krama balu Lanang luput ayahan Istri.

Pawos 9

- (1) Wusan makrama Desa majalaran sakadi ring sor:
- ha. Seda;

- na. Kesah ka dura Desa saking rahayu maduluran antuk ilikita saking Prajuru Desa;
 - ca. Sampun nyada manut jalarannya;
 - ra. Kausanang utawi kadaut pipilnya sajeroning Paruman Desa riantukan
 - kasinanggeh banget kasisipannya ring Desa.
- (2) Wusan utawi ngusanang Krama, panemayannya padgatakala manut Pararem.
- (3) Sang usan makrama tan wenang polih pah-pahan druwen Desa sakaluirnya.
- (4) Prade sang pecak wusan makrama Desa malih mapinunas pacang mawali makrama, patut katrima manut pamargi sakadi ring sor:
- ha. Prade wusannya rihin saking rahayu, patut naur panawub wawangunan manut Pararem;
 - na. Prade wusannya sangkaning tan rahayu, patut keni panawub wawangunan lan pamidanda ular-alir manut Pararem, sasampune nunas pangampura sajeroning Paruman Desa;

Palet 2

Prajuru Desa

Pawos 10

- (1) Desa Pakraman kaenter olih Bandesa sane kasanggra olih:
- ha. Patajuh pinaka wakil;
 - na. Panyarikan pinaka juru surat;
 - ca. Patengen pinaka juru raksa;
 - ra. Kasinoman pinaka juru arah.
 - ka. Pacalang pinaka jaga Bhaya Desa.
- (2) Krama tempek kaenter olih Kelihan tempek.
- (3) Gaguat ngadegang dados Prajuru Desa sakadi ring sor:
- ha. Mawit saking Krama Desa Pakraman;

- na. Maagama Hindu;
 - ca. Jujur tur polos;
 - ra. Maparisolah becik;
 - ka. Uning ngwacen lan nyurat;
 - da. Uning ring panglokika lan wicaksana.
- (4) Nyudi lan ngadegang Prajuru patut kalaksanayang olih Krama sajeroning Paruman.
 - (5) Waneng dados Prajuru Desa kamanggehang 5 (limang) warsa, tur dados kasudi malih apisan.
 - (6) Prajuru sane sampun tutug wanengnya 5 (limang) warsa, patut nyerahang swadharmaning Prajuru sajeroning Paruman Desa. Mangda kawentenang sasudian malih.
 - (7) Sanistannya 4 (petang) sasih sadurung tutug sangkernya, Prajuru patut nambyakang indik tutug waneng inucap sajeroning paruman, saha mangda kapidabdbabin nyudi Prajuru sane pacang mangentosin.

Pawos 11

- (1) Swadharmaning Bandesa luire:
 - ha. Nganterang pamargin adat manut daging Awig-Awig miwah Pararem Desa;
 - na. Nuntun tur nganterang Krama ngupadi kasukertan Krama manut patitis lan pamikukuh Desa;
 - ca. Maosin wicaran Krama utawi Warga Desa, saha niwakang pamutus lan pamidanda manut Awig-Awig mwaning Pararem Desa;
 - ra. Pinaka saksi ritatkala Krama ngawentenang Yadnya manut kabuatan;
 - ka. Pinaka Duta Desa Pakraman ritatkala ngawentenang babawos ring sapesira ugi.
- (2) Sajeroning nganterang pamargin Adat, Bandesa patut ngawentenang pawirasan ring Prajuru, kasarengin antuk para yogya sane wenten ring Desa Pakraman mangda tan singsal pamargi.

- (3) Swadharmaning Prajuru sane siyosan, sajawaning gegaduhan manut Pawos 10 (dasa) Wiwit (1), taler patut ngarombo Bandesa Pakraman sajeroning pawirasan sakadi kecaping ajeng.
- (4) Prade wenten sinalih tunggil Prajuru iwang pamargi, minakadi ngalinyokang druwen Desa mwanng sapanunggilannya tur keni kabuktiang kaiwangannya, punapi malih banget tempal ring kecaping Awig-Awig lan Pararem, patut keni pamidanda artha manut Pararem, tur patut kausanang dados Prajuru.
- (5) Prajuru sane sajeroning wicara arep ring Desa tan kapatutang ngenter miwah midabdabin Desa.

Pawos 12

Olih-olihan Prajuru Desa luire:

- ha. Polih pathias utawi cacenengan saluiring duman ring Desa;
- na. Polih olih-olihan siyosan manut Pararem.

Pawos 13

(1) Prajuru Desa kagentosin majalaran:

- ha. Seda;
- na. Sampun tutug sengker dados Prajuru;
- ca. Tan prasida ngamargiang swadharmaning Prajuru duaning katiben sungkan rahat utawi pialang abot siyosan saha sampun kasungkemin ring sajeroning Paruman Desa;
- ra. Pinunas ngraga tur sampun kalugra pinunasnya antuk Paruman Krama;
- ka. Kanorayang antuk Paruman duaning banget iwang pamargi.

(2) Ngararyanang utawi ngantosin Prajuru patut kasungkemin ring Paruman Krama.

Palet 3
Indik Kukul
Pawos 14

- (1) Kukul sane wenten ring Desa Pakraman luire:
 - ha. Kukul Desa Pakraman;
 - na. Kukul Tempek;
 - ca. Kukul Pura;
 - ra. Kukul Sekaa-Sekaa.
- (2) Suaraning kukul kasinanggeh pinaka suaraning Desa utawi Sekaa, satmaka atur utawi dadawuhan saking Prajuru mantuka ring Kramannia soang- soang.
- (3) Tabuh tatepakan kukul inucap patut pastika manut tetujon tur manut ring pasubhayan Kramannya.
- (4) Pamargi sane patut macihna antuk suaran kukkul luire:
 - ha. Pacang sangkep utawi Parum;
 - na. Tedun makarya utawi ngayah;
 - ca. Ngawit utawi nglebar Bhrata Panyepian;
 - ra. Pacang ngrantebin utawi mapitulung, ritatkala wenten Warga seda, ngarangkat utawi Yadnya siyosan manut kabuatan;
 - ka. Wenten katiben bhaya.
- (5) Tabuh tatepakan kukul saha cihna ipun sane kamanggehang ring Desa Pakraman sakadi ring sor:
 - ha. Kalih tuludan sedeng cihna: tedun ngayah utawi makarya, sangkep utawi Parum, ngawitin lan ngelebar Bhrata Panyepian;
 - na. Tigang klentungan sedeng cihna: wenten Warga mawiwaha, saha katepak ritatkala wengi;
 - ca. Limang klentungang sedeng cihna: wenten Warga seda;

ra. Bulus sada panjang cihna: wenten katiben bhaya;

ka. Negteg nyangsih cihna: wenten pamargin upacara Yadnya.

Pawos 15

- (1) Sahananing kulkul Desa Pakraman patut katepak olih Prajuru utawi sang kapituduh olih Prajurunya manut tetujon.
- (2) Sapasira ugi nepak kulkul tan sangkaning pituduh saking Prajuru Desa, wenang keni pamidanda manut Pararem, sajawaning ritatkala wenten bhaya.
- (3) Sang nepak kulkul cihna katiben bhaya patut manggeh ring genah kulkul inucap saha matur supeksa ring Prajuru mungging tatujon panepakannya.

Palet 4

Indik Sangkepan lan Paruman

Pawos 16

- (1) Sangkepan Desa kamargiang sanistanya nyabran 6 sasih./
- (2) Paruman Desa kalaksanayang sanistannya nyabran warsa nemonin Purnama Kesanga tan paarah-arah.
- (3) Paruman Desa kamargiang padgatakala manut kabuatan tur kamanggala antuk arah-arah.
- (4) Sangkepan ring Kahyangan Desa. Sekaa-Sekaa kawentenang manut drestannya soang-soang.
- (5) Sangkepan Prajuru kawentenang sanistanya nyabran 3 sasih apisan ring rahina Sukra Umanis.

Pawos 17

- (1) Sane patut kadamyakang sajeroning paruman Desa Pakraman luire:

- ha. Munjuk lungsuring Krama mwanng ayah-ayahan Desa;
 - na. Saluir sulur Artha brana druwen Desa;
 - ca. Pamargin sahananing pamutus Paruman sadurungnya;
 - ra. Saluiring pamutus wicara sane katiwakang;
 - ka. Pangrancana Prajuru indik nganinin usaha kapungkur.
- (2) Parindikan sakadi kecap Wiwit (1), patut katampenin, katimbangin saha katiwakin pamutus antuk Paruman inucap.
- (3) Sangkepan Sekaa-Sekaa sane pacang ngardi pamutus, patut matur supeksa ring Prajuru Desa mangda tan lempas ring patitis miwah pamikukuh Desa Pakraman.

Pawos 18

- (1) Tata-titi sangkepan utawi Paruman sakadi ring sor:
- ha. Macihna antuk suaran kulkul;
 - na. Sahananing Krama sane pacang nyarengin patut mabusana adat madya;
 - ca. Tan kalugra makta saluiring gegawan;
 - ra. Tan kalugra ngawetuang suara bangras, biota ring sangkepan utawi Paruman.
- (2) Dudonan pamargin Paruman sakadi ring sor:
- ha. Kamanggala antuk suaran kulkul;
 - na. Prasida kamargiang risampune katedunin antuk satenga langkung saking paiguman Krama sane patut nedunin;
 - ca. Kakawitan antuk pangarcana Ida Bhagawan Panyarikan masadana antuk cane, kalanturang antuk macak Krama;
 - ra. Nguncarang pangastungkara panganjali saking Bandesa tur kasaurin antuk Krama sami.
- (3) Pamutus bebawosan mangda kausahayang majalaran antuk paras-paros, sagilik-saguluk. Prade tan prasida, pawilangan suara sane akehan kasinanggeh pamutus.

- 4) Prade sajeroning Paruman pandidikan sane kabaosin tan prasida molihang pamutus, Prajuru patut nanggehang pandidikan punika tur kabaosang malih ring Paruman sane pacang rauh.
- 5) Sangkepan Prajuru matetujon:
 - ha. Ngrincikang sahananing pangrencana sane pacang kamargiang;
 - na Maosang wicaran Krama sane kasadokang ring Prajuru sadurung niwakang panepas majeng ring sang mawicara.
- (6) Pamutus sangkepan Prajuru durung kangkat kamargiang sadurung kasungkemin olih Paruman Krama, punapi malih sane marupa tetegenan Krama.

Palet 5

Indik Druwen Desa

Pawos 19

- (1) Sane kamanggehang pinaka druwen Desa Pakraman luire:
 - ha. Kahyangan Desa, minakadi Pura Dalem, Pura Puseh, Bale Agung, Pura Gunung Sari lan Pura Sebulantang,
 - na. Tanah tegak pura Kahyangan Desa, tegak Bale Desa, Tanah laba Pura miwah telajakannya;
 - ca. Tanah Setra;
 - ra. Tanah Pakarangan Desa;
 - ka. Lelanguan ilen-ilen Gong lan sakaluirnya;
 - da. Ilen-ilen Sanghyang.
 - ta. Sakancen druwen Desa siyosan sane kapikolihang kapungkur wekasan.
- (2) Sahananing druwen Desa patut mangda kaungguhang ring ilikita sane pastika, tur kadambyakang nyabran sangkepan Krama.

Pawos 20

- (1) Prade wenten sinalih tunggil Krama utawi Warga Desa mamandung druwen Desa, patut katiwakin pamidanda manut Pararem tur ngawaliang sakancan barang sane kapandung.
- (2) Prade barang sane kapandung punika sinanggeh barang sane suci, patut keni pamidanda manut pararem, kawewehin antuk pamrayascita manut kabuatan.
- (3) Prade wenten druwen Desa utawi Pura ical tur tan wenten Krama sane ngangken ngambil, wenang Kramane sami katiwakin padewa saksian.
- (4) Prade ritatkala ngemargiang padewasaksian wenten Krama tan prasida rauh, patut natur piuning ring Prajuru. Prajuru patut maritatas, saha paritetase kadambyakang majeng ring Krama Desa.

Palet 6

Sukerta Pamitegep

Kaping 1

Karang lan Tegal

Pawos 21

- (1) Sahananing karang paumahan, patut wenten wates sane pastika, sanistan ipun antuk pepagehan.
- (2) Karang utawi tanah paumahan sane masanding, mungguing wates ipun kapidabdabin sakadi ring sor:
 - ha. Wates sisi kaler, sisi kangin miwah sane nepi rurung utawi margi kakaryanin tur kapiara antuk sang ngamong karang inucap;
 - na. Wates sisi kelod utawi sisi kauh sajawaning sane nepi rurung utawi margi kakaryanin olih sang ngenahin karang penyanding sane delodan utawi dauhan;

ca. Prade sangkaning pada lila, kangkat kawentenang pamargi siyosan ring aksara ha lan aksara na.

(3) Prade wenten tegak karang paumahan sane kabebeng patut kautsahayang wenten pamedalnya karurung utawi margine sanistanya apapaga sawetara adepa malarapan antuk paras-paros sareng panyandingnya, utawi nunas pamutus ring Prajuru.

Pawos 22

(1) Sapa sira ugi tan kapatutang malaksana sakadi ring sor:

ha. Nglahlah tegal wiadin karang druen anak siyosan, sajawaning wenten panguwak saking sang nrebenang.

na. Nglahlah margi, rurung, tegak Banjar, Setra mwanng sakancan tegak sane kasinanggeh suci siyosan.

(2) Sang mamurug kecap Wiwit (1), patut katiwakin pamidanda luire:

ha. Ngawaliang tanah sane kalahlah manut wates nyane rihin.

na. Upacara panyangaskara prade genah sane kalahlah punika marupa genah sane kasinanggeh suci.

Pawos 23

(1) Sahanan Warga Desa Pakraman, patut sayaga miara karesikan pakarangan mwanng telajakannya, rauh ring margi utawi rurung manut tetiwak saking prajuru.

(2) Sajeroning usaha ngrajegang karesikan wawengkon Desa Pakraman, soang-soang pakarangan kaaptiang mangda:

ha. Wenten blumbang genah luhu;

na. Madruwe kakus;

ca. Prade makarya kandang bawi sajeroning pakarangan, mangda ugi kajangkepin antuk waduk utawi blumbang genah kotoran ipun;

ra. Tan dados makarya genah ngutang kotoran ring tepining margi utawi rurung.

(3) Sang mamurug kecap Wiwit (2), patut katiwakin pamidanda manut Pararem.

(4) Krama wiadin Warga Desa sane madrebe tegal, kaaptiang mangda mastikayang padrebeannya antuk ilikita marupa sertifikat saking Guru Wisesa.

Kaping 2

Kakayon

Pawos 24

(1) Sapa sira ugi ngawit pacang nandur kakayonan tanem tuwuh sane pacang dados ageng sajeroning pakarangan, patut paembangnya sakeng wates karang tan kirang ring adepe agung.

(2) Tanem tuuh sane ngarebrebin utawi kasumangsayain pacang nyangkalen kapisaga kengin kawara madasar antuk paigum sane becik, mangda kakayonan punika gelis karebah utawi katebtebin.

(3) Prade risampune kawara, sang nrebenang taler tan satinut utawi nenten nagingin pinunas sang ngawara, prade sang karebrebin rumasa pacang kabhayanin kengin nyadokang ring Prajuru Desa.

(4) Prajuru Desa wenang mratiyaksayang saha maweh panyepat pamutus arep ring sang madrebe kakayonan, mangda kakayonan sane kawara digelis karebah utawi katebtebin.

(5) Sang mamurug keni pamidanda manut Pararem.

Kaping 3

Indik Wewangunan

Pawos 25

- (1) Sapa sira ugi pacang makarya wawangunan, tan kapatutang nyapcap kapisaga.
- (2) Wawangunan sane sampun wenten, sane kantun nyapcap kapisaga, mangda kautsahayang ngaryanang abangan sapatutnya.
- (3) Sapa sira ugi tan tinut ring Wiwit (1) lan Wiwit (2), risampune wenten pasadok ring Prajuru wenang kaicen panepas kadasarin antuk paras paros. Prade tatiwak saking Prajuru taler tan katinutin kangkat wicara kaaturang ring sang Guru Wisesa tur sang mamurug keni pamidanda manut Pararem.

Pawos 26

- (1) Wawangunan tempek patut kawangun ring tanah tempek kaprabeyanin olih Krama tempek inucap.
- (2) Wawangunan Banjar patut kawangun ring tanah druwen Banjar lan wawangunan Desa kawangun ring tanah druwen Desa saha kaprabeyanin olih Krama Desa.

Kaping 4

Indik Wawalungan

Pawos 27

- (1) Krama wiadin Warga Desa sane miara wawalungan patut sayaga nitenin wawalungan inucap minakadi negul utawi nglogor, mangda tan jantos ngerusak karang pabianan anak siyos, punapi malih ngantos ngaletihin Kahyangan.

- (2) Prade wenten wawalungan ngeleb ngantos ngrusak pabianan utawi pakarangan anak siyos, risampune nahen kapalungguhang taler tan katinutin. kengin kataban tur kasadokang ring Prajuru, Prajuru wenang niwakang pamidanda manut Pararem.
- (3) Prade wabalungan inucap ngantos ngaletihin genah suci, sejawaning pamidanda mwang karugian sakadi munggah ring wiwit (2) patut taler kawewehin antuk pamidanda pangupakara Kahyangan inucap manut kabuatan.
- (4) Sapa sira ugi tan kapatutang mademang, utawi medil sahananing paksi sajeroning Desa Pakraman, sang mamurug patut keni pamidanda manut Pararem.

Pawos 28

- (1) Tan kadadosang ngangonang utawi negulang wawalungan ring margi, rurung, Setra. Pakarangan Banjar utawi Desa lan telajakannya.
- (2) Soang-soang kulawarga patut nitenin Asu padruwennya saha ngupapira mangda tan nyangkalen.

Pawos 29

- (1) Tan kalugra nglumbar ayam ritakala Warga Desa ngawit matetanduran utawi matajuk mawaneng 15 (limolas) rahina ngawit saking nandur.
- (2) Sang madrebe tegal pabianan patut masadok ring sang madrebe ayam malumbar ritakala jagi ngawitin matanduran.
- (3) Prade risampun masadok, taler kanton wenten ayam malumbar, kengin sang madrebe pabianan. ngejuk ayam inucap tur nyadokang ring Prajuru Desa, saha niwakang panepas utawi pamidanda manut Pararem.

Kaping 5

Indik Bhaya Lan Dusta

Pawos 30

- (1) Sahananing laksana tan rahayu sane ngawinang pikobet, dukkita, duskerta ring Jadma siyosan kasinanggeh bhaya.
- (2) Bacakan sane kabawos bhaya luire:
 - ha. Jiwa bhaya : Kaamuk, kabaak, lan kaparikosa;
 - na. Artha bhaya : Kamalingan, kabegalan lan sapanunggilannya;
 - ca. Geni bhaya : Katunuan utawi puun;
 - ra. Toya bhaya : Anyud lan sapanunggilannya.
 - ka. Bhayu bhaya : Katiben linus.
 - Da. Chora Bhaya : sahananing parilaksanan sané ngametuang pikobet anak siyosan.

Pawos 31

- (1) Warga Desa sane katiben bhaya patut digelis masadok ring Prajuru utawi sang wenang mawosin.
- (2) Sang katiben bhaya utawi sang manggihin kawentenan bhaya patut nepak kulkul manut wigunannya saha digelis matur supeksa ring Prajuru mangda sang katiben bhaya gelis polih pitulung.
- (3) Sahanan Warga Desa patut sayaga maweh pitulung saha makta piranti manut kawentenan bhaya inucap.

Pawos 32

- (1) Sang kamalingan prade pacang ngamargiang masaserep patut nunas panguwak saking Prajuru.

- (2) Maseserep ka dura Desa patut polih panguwak saking prajuru sane ngawidangin genahe masaserep.
- (3) Prajuru patut ngenter sang maseserep mangda tan ngantos ngawetuang biyota.

Pawos 33

- (1) Sahanan Warga malaksana dusta ngawinang bhaya, kengin katur ring Guru Wisesa manut bobot kaiwangannya.
- (2) Prade dusta ngawinang kaletihan genah sane kasinanggeh suci, wenang katiwakin pamidanda manut Pararem saha pamrayascita manut kabuatan.
- (3) Sang malaksana dura cara ring Agama, prade kacihna manut Tri Premana (saksi, bukti, lan ilikita), patut katiwakin pamidanda manut Pararem.
- (4) Prade wenten Warga Desa malaksana duskerti minakadi asta capala, pada capala, wak capala ring Warga siyosan prade kawicarayang tur prasida kabuktiang, sang malaksana patut keni pamidanda manut Pararem.
- (5) Prade laksana inucap nibenin Warga sane kapasinggihang manut Agama, patut pamidandanya kawewehin pamrayascita marep ring sang katiben manut kabuwatan.
- (6) Prade wenten warga nguman-uman wiadin kroda ring Warga Desa napi malih ring sang sane kapisinggihang, patut katiwakin pamidanda saha pamrayascita manut Pararem.
- (7) Prade wenten dusta saking dura Desa, patut kaejuk tur katur ring Guru Wisesa.

Kaping 6

Pangunyan Desa

Pawos 34

- (1) Ritatkala wenten Krama Desa ngwangun karya utawi Yadnya patut polih panyanggra utawi pangrombo saking Krama Desa manut pinunas sang mayadnya.

- (2) Panyambrama utawi pisuguh ring Krama ritakala mapitulung kamargiang manut dresta.
- (3) Sajawaning pamargi panyanggra utawi pangunyan manut dresta, Krama sane madrebe lalangan kengin ngaturang tetangguran santukan rumasa pinaka tangan sukuning Desa.

CATURTAS SARGAH SUKERTA TATA AGAMA

Palet 1

Indik Dewa Yadnya

Pawos 35

- (1) Pura-Pura sane wenten ring Desa Pakraman luire:
 - ha. Pura Dalem, Pura Puseh, Bale Agung, Pura Gunung Sari lan Pura Sebulantang;
 - na. Pura-pura Marajan utawi paibon.
- (2) Pura Kahyangan Desa kasungsong lan kaempon olih Krama Desa, Pura Marajan utawi paibon kasungsong olih pangemponya soang-soang.
- (3) Piodalan ring Pura-Pura inucap kalaksanayang sakadi ring sor:
 - ha. Pura Dalem nemonin rahina Buda Kliwon Matal;
 - na. Pura Puseh lan Bale Agung nemonin rahina Anggara Wage Ugu;
 - ca. Pura Gunung Sari nemonin rahina Buda Wage Merakih;
 - ra. Pura Sebulantang nemonin rahina Saniscara Kliwon Landep;
 - ka. Pura Marajan lan Paibon manut drestannya soang-soang.

Pawos 36

- (1) Ring soang-soang Pura patut kaadegang Pamangku sane yogya ngenterang, nuntun utawi ngastawayang sahanan Yadnya ring pura inucap.
- (2)

(2) Gaguat dados pamangku luire:

ha. Krama Desa Pakraman marep utawi sane sampun nyada;

na. Tan cedangga banget;

ca. Maparipolah sane rahayu;

ra. Uning nyurat tur ngawacen sastra Agama.

(3) Tata cara ngadegang Pamangku sakadi ring sor:

ha. Madasar katurunan saking pamangku sane rihinan.

na. Malarapan antuk nyanjan utawi kacatri.

ca. Saking sasudian Krama.

(4) Dudonan ngadegang Pamangku luire:

ha. Kararemin pacang dados Pamangku;

na. Nunas waranugraha ring Pura malarapan pawintenan;

ca. Nyuciang raga utawi mawinten kapuput olih Ida Sang Sulinggih.

(5) Sang kasudi dados Pamangku riwus puput pawintenannia, patut ngamargiang swadharmaning Pamangku, tur patut kasinggihang olih Warga Desa manut swadhamanya.

Pawos 37

Swadharmaning Pamangku luire:

ha. Asewaka Dharma, astiti bhakti ring Ida Sang Hyang Widhi Wasa, utamanya ring Ida Bhatara sasuhunan:

na. Ngenterang, ngastawayang sahananing upakara ritatkala patirtan utawi Yadnya siyosan ring pura;

ca. Ngastawayang ritatkala wenten Krama ngaturang punia, jagi mapanauran utawi nunas karahajengan ring Pura;

ra. Ngalaksanayang pamargi sane mabuat suci ring Pura, pamekas ritatkala nedunang utawi ngelinggihang pralingga Ida Bhatara;

ka. Nuntun Krama lan Warga Desa mangda setata astiti bhakti ring Ida Sang Hyang Widhi Wasa tur malaksana Susila manut Agama;

da. Nyiratang tirta majeng ring Krama utawi Warga sane kasinanggeh patut.

Pawos 38

- (1) Sahananing aturan utawi sesangi marupa artha, laluwesane, mule-mule muah sakaluirnya patut kadruwenang olih Pura inucap.
- (2) Sang pacang maturan, mapanauran ring Kahyangan Desa patut masadok ring Prajuru mangda kaungguhang ring ilikita sesampune keastawayang olih Pamangku.
- (3) Sakancan aturan ring ajeng wenang kaanggen ring Pura manut tetujon.
- (4) Sahanan sarin canang ring Kahyangan Tiga patut kaepah tiga, apah tiga katur ring Pura, apah tiga ring Desa miwah apah tiga ring Jro Mangku.

Pawos 39

- (1) Pamangku kagentosin malarapan antuk:
 - ha. Seda;
 - na. Sangkaning pinunas ngraga kasungkeming ring Paruman;
 - ca. Kanorayang olih Krama riantukan malaksana dusta.
- (2) Prade Jro Mangku kawusanang sangkaning malaksana dusta patut Pamangku inucap ngawaliang sahananing piranti kapamangkuan druwen Desa sane karaksa.
- (3) Prade Jro Mangku malih ngalap rabi sangkaning rahayu, patut Pamangku inucap malih nyepuh raga tur kayogya olih Prajuru sahananing prabeannya kamedalang olih Pamangku inucap.
- (4) Prade Jro Mangku Kahyangan Desa seda, patut kamargiang upacara panganbenan, karombo saha kaprabeyanin olih Krama Desa.

Pawos 40

(1) Kahyangan kasinanggeh kadurmanggalan prade:

- ha. Katiben bhaya;
- na. Kapandungan;
- ca. Karubuhan taru;
- ra. Sander kilap;
- ka. Kahanan wangken Jadma utawi wangken Sato ageng;
- da. Dados genah Jadma masanggama.

(2) Kasukertan Kahyangan kapidabdabin sakadi ring sor:

ha. Sahanan Krama lan Warga Desa patut nureksa, nyaga, mangda kasukertan Kahyangan tan kaletahan.

na. Sane tan kalugra ngranjing ka Pura luire:

1. Sang kantun sebel ring raga manut jalarannya.
2. Sang kantun cuntaka sangkaning madrebe kula Warga seda utawi ngamargiang upacara Pitra Yadnya manut sengker.
3. Warga sane sinanggeh patita minakadi: panak bebinjat, beling tan wenten ngangkenin, Jadma buduh, sakit ila, mwang sakancan cedangga siyosan sadurung polih pamrayascita manut Sastra Agama.
4. Sato ageng sajawaning ritatkala mapepada.
5. Sang mabhusana tan manut ring tata susila ngranjing ka Pura.
6. Sang makta sakaluwiring barang sane kabaos leteh manut Agama.
7. Sahanan sane kabawos ngeletihin manut Pararem.

ca. Pratingkah sane tan kawenangang ring Pura luire:

1. Masumpah utawi nahap cor, sajawaning saking pituduh Prajuru.
2. Maulah ala, maujar ala, wak parusia.
3. Marebat, mayuda, punapi malih ngantos wenten ngamedalang rah.

4. Mecikang wastra, nyangsang bhusana, mecikang pusungan lan sapanunggilanya sajawaning Sulinggih lan Pragina.
 5. Mewarih, makoratan, macecepin Anak Alit.
 6. Masanggama.
- (3) Prade mabukti wenten Warga malaksana ngaletihin sakadi wiwit (2) aksara ca, patut keni pamidanda manut Pararem. Saha kawewehin antuk pamryascita manut kabuwatan.
 - (4) Prade wenten Kahyangan Desa keni kadurmanggalan, Pamangku utawi sang manggihin patut digelis nyadokang ring Prajuru mangda marumang Krama pacang ngawentenang pangupakara sapatutnya.
 - (5) Prade wenten jadma buduh ngantos ngarusak Pura, inggihan punika palinggih utawi sane siyosan, kapatutannya patut mecikang sahanan sane karusak tur keni pamrayascita.

Palet 2

Indik Resi Yadnya

Pawos 41

Indik Rsi Yadnya ring Desa Pakraman kamargiang manut Sastra Agama lan panuntun saking Parisada.

Palet 3

Indik Pitra Yadnya

Pawos 42

- (1) Sahanan upacara pamretékan sawa kabawos Pitra Yadnya, kahaptiang mangda nganutin sastra Agama.
- (2) Prade wenten Krama utawi Warga Desa seda, pamargine sane kangkat kaambil sakadi ring sor:
ha. Kapendem manut dresta.

- na. Mangkingsan manut sastra Agama;
- ca. Ngraris kaabenang manut uger-uger padewasan.
- (3) Gaguat mendem sawa luire:
- ha. Prade sang seda sampun ketus untu, patut nganutin padewasan pangutangan sawa, nanging prade rare durung ketus untu, kengin pendem pramangkin tan malih ngantos dewasa.
- na. Genah mendem ugi mangda ring Setra, prade rare ring Setra bajangan.

Pawos 43

- (1) Padewasaan mendem utawi atiwa-tiwa kapidabdabin olih Prajuru manut dresta.
- (2) Tan kalugra mendem utawi ngeseng sawa ritakala rahina: Pasah, Purnama, Tilem, Kala Gotongan, Semut Sedulur, Yama mwanng rarahinan Jagat.
- (3) Prade wenten Warga Desa seda ritakala wali ring sinalih tunggil Paibon utawi Marajan. Kahyangan Desa sane wenten ring wawengkon Desa Pakraman, pamargine mendem sawa patut kalaksanayang sasampun pujawaline ring pura inucap puput kamargiang ngantos nyineb.
- (4) Prade wenten sinalih tunggil Werdha Desa seda ritakala wenten Karya wiadin piodalan ring sinalih tunggil Kahyangan Desa sane wenten ring wawidangan Desa Pakraman dados masiliban pramangkin ring Setra, nanging tan nganggen gegumuk. Pamretekannya patut kalaksanayang sesampune polah-palih karyane puput. Pamargine inucap kabawos sasiliban.
- (5) Prade wenten sinalih tunggil Warga Desa seda ritakala wenten Yadnya ring Kahyangan Jagat sane wenten ring dura Desa sawawidangan Kecamatan Nusa Penida. pamargine mendem kalaksanayang nganutin piteket saking Parisada utawi Guru Wisesa.

Pawos 44

- (1) Krama utawi Warga Desa seda sangkaning salah pati, ulah pati miwah sapanunggilannya, kengin kabakta budal, nanging patut kasanggra antuk banten pangulapan mwang panebusan, pratekannya kamargiang sakadi patut.
- (2) Prade wenten jadmah Istri padem ritatkala kantung ngadut bobotan, tan wenang kapendem sadurung bobotania embas, utawi kaembasang.
- (3) Prade wenten Warga dura Desa seda ring wawengkon Desa Pakraman Pundukaha Kaja, prade sawannya tan wenten ngangkenin, sawannya kaatur ring Guru Wisesa, pamrayascita lan pecaruan kalaksanayang olih Desa Pakraman.
- (4) Prade wenten Warga Desa seda ring tegalan, kapatutannya patut ngalaksanayang pamrayascita pacaruan sanistanya amanca warna, kalaksanayang ring genah inucap mawaneng sadurung asasih pitung rahina.

Pawos 45

- (1) Swadharmaning Krama lan Prajuru ritatkala wenten kalayusekaran sakadi ring sor:

ha. Krama sane kalayusekaran luire:

1. Patut digelis masadok ring Kelihan Banjar, saha nunas tatimbang mungguing kawentenanya.
2. Nunas pangarombo ring Krama Desa, manut kabuatan.
3. Ngaturang panyambrama pisuguh sakasidan majeng ring Krama sane rauh ngrombo karya manut dresta.

na. Prajuru Pakraman sasampune polih pasadok, patut:

1. Maritatas tetujon pamargin sang kalayusekaran.
2. Nyuarayang kulkul manut tetujon, raris ngenter pemargi Krama sajeroning ngrombo karya wiadin pamargin patas manut dresta.

ca. Krama Desa patut:

1. Ngarombo sang kalayusekaran sapatutnya manut dresta.
 2. Maweh patus saha ayah-ayah manut pidabdab sane sampun kararemin.
- (2) Ritatkala ngamargiang nyandang utawi nanggung sawa, wadah mwang upakara sane siyosan, pamarginnya ka Setra patut mangda dabdab, tan kadadosang magarap-garapan ngantos ngawinang pikobet sang madruwe Yadnya, sang mamurug patut keni pamidanda manut Pararem.
- (3) Ritatkala nyanggra upacara Krama sane seda kapendem utawi kaabenan, Krama Desa patut nganggen bhusana adat madya, tur tan kapatutang mabungah-bungahan.
- (4) Sawa saking dura Desa sane matempung Ngaben ring Desa Pakraman polih panyanggran Desa, tur sang matempung patut keni pananjung batu, pangungkap lawing lan panukun Setra manut Pararem.

Pawos 46

(1) Sang kasinanggeh cuntaka miwah sebel luire:

ha. Sang kalayusekaran;

na. Sang nyambut karya Pitra Yadnya;

ca. Ngaraja;

ra. Ngembasang oka;

ka. Karuron.

(2) Sengker sebel miwah cuntaka manut jalarannya sakadi ring sor:

ha. Kalayusekaran, sengker cuntaka mahajeng ring kulawarga sajeroning pakarangan 11 (solas) rahina, Krama Banjar 3 (tigang) rahina.

na. Nyambut karya Pitra Yadnya sengker cuntaka ngawit saking ngulapin jantos 3 (tigang) rahina riwus pangutangan.

ca. Ngaraja, ngawit ngaraja ngantos mersihin raga.

- ra. Ngembasang oka, sane istri 42 (petang dasa kalih) rahina, sane lanang 11(solas) rahina ngawit okane embas.
 - ka. Karuron, kulawargannya sapakarangan ngantos 42 (petang dasa kalih) rahina.
- (3) Prade wenten Krama wiadin Warga Desa seda ritatkala sampun nyambutang Karya utawi Yadnya ring Kahyangan Desa, sane dados nyuntakayang wantah sang ngarepin kemawon.
- (4) Sane kesinanggehang tan keneng cuntaka luire:
- ha. Ida Sang Sulinggih.
 - na. Pamangku Kahyangan Desa.

Pawos 47

- (1) Sawa sane patut kaabenang wantah sawa sang sampun maketus untu , prade durung ketus untu kawenangang wantah ngalungah.
- (2) Krama sane pacang ngamargiang ngaben kapatutang mangda nuduk patus Desa.

Pawos 48

- Ayah-ayahan patus ritatkala wenten ngaben luire:
- ha. Ngaresikin utawi ngabas margi rauh ke Setra.
 - na. Makarya rarompok mwanng tetaring.
 - ca. Makarya tatakan api utawi prapen.
 - ra. Makarya bale pawedaan.
 - ka. Ngaryanang wadah mwanng eteh-ete siyosan.

- da. Ngarombo karya ngantos puput.
- ta. Karya siyosan manut paigum lan pangenter Prajuru.

Pawos 49

- (1) Prade wenten Jadma saking dura Desa ngabenang sawa utawi matempung ngaben ring sinalih tunggil Krama Desa Pakraman, Krama sane pacang matempung ngaben patut masadok sadurungnya ring Prajuru, tur sang madruwe sawa inucap patut naur kenan-kenan luire:
 - ha. Panukun Setra.
 - na. Pananjung batu.
 - ca. Pangungkap lawing.
 - ra. Panebus atma, akehnya manut Pararem.
- (2) Sahananing aturan ring pura sane mawit saking pangungkab lawang, panukun Setra, pananjung batu, panebus atma, manggeh dados druwen Desa tur patut kaungghang ring ilikita.
- (3) Pamangku ring Pura Dalem patut polih pah-pahan aturan inucap manut Pararem.

Palet 4

Indik Manusa Yadnya

Pawos 50

- (1) Manusa Yadnya inggih punika: upacara dharmaning manusa saking patemoning kama bang kalawan kama petak sajeroning garbhawasaning ibu ngantos seda.

Upacara Manusa Yadnya lwire :

 - ha. Rare wawu embas.
 - na. Kepus puser utawi pungsed,
 - ca. 11 (solas) rahina utawi ngalepas A OM (A : Agni OM : Siwa),
 - ra. Tutug akambuhan mapag rare rikala rarene mayusa 42 (abulan pitung rahina).
 - ka. 3 (tigang) sasih.

- da. Aoton utawi 6 (nem) sasih,
 - ta. Mungguh truna utawi daha,
 - sa. Mapandes utawi matatah,
 - wa. Mawiwaha.
- (2) Upakara lan upacara marut sakadi Wiwit (1) kamanggehang manut sastra Agama mwanng dresta saha pamarginne nganutin kawentenan kanista, madya lan utama.

Palet 5

Indik Bhuta Yadnya

Pawos 51

- (1) Bhuta Yadnya inggih punika: sahananing upacara yadnya sane matetujon nyomiyahang Bhuta Kala Durga Bucari manados Bhuta Kala Durga Bucari Hitha.
- (2) Upacara-upakara pabeyakalan ring sarwa prani luire:
- ha. Ring sarwa tumuuh, nemonin Tumpek Wariga.
 - na. Ring sarwa prani utawi ingon-ingon, nemonin rahina Tumpek Uye.
- (3) Upakara pabeyakalan ring pertiwi, Kahyangan lan sarwa bhuta kala kabawos caru, luire:
- ha. Yadnya Sesa;
 - na. Segehan;
 - ca. Caru Eka Sata;
 - ra. Caru Manca Sata;
 - ka. Caru Manca Sanak;
 - da. Caru Manca Kelud;
 - ta. Caru Rsigana
 - sa. Balik Sumpah, Tawur Agung lan sapanunggilannya.
- (4) Sajaba upacara Bhuta Yadnya sakadi kecap ring Wiwit (3), taler kamargiang upacara pabeyakalan ring manusa manut wiguna.

Pawos 52

- (1) Ritakala Tileming sasih Kasanga, ring wawidangan Desa Pakraman taler kamargiang Bhuta Yadnya pacaruan sakadi ring sor:
 - ha. Ring Pempatan Desa Caru Manca Sata;
 - na. Ring Pura-Pura Paibon, Kahyangan Desa manut dresta kamargiang Caru Eka Sata;
 - ca. Ring soang-soang paumahan utawi pakarangan upakaranya nganutin pituduh Guru Wisesa.
- (2) Sorenya kamargiang Pangrupukan pabuu-buu, kapidabdabin olih Prajuru karombo olih Pacalang, ngawit sandikawon utawi sandi kala tan kengin lintang ring tengah wengi.
- (3) Benjangnya kamargiang Catur Bhrata Penyejian luire:
 - ha. Amati geni;
 - na. Amati karya;
 - ca. Amati lelungan;
 - ra. Amati lelungan.
- (4) Pamargin Catur Bhrata Penyejian katuntun olih Prajuru, ngawit miwah ngalebar Bhrata Panyepian kacihnayang antuk suaran kulkul.
- (5) Sang mamurug Bhrata Panyepian, wenang keni pamidanda manut Pararem, sajawaning sang polih wak-wakan manut wiguna.
- (6) Tatiwak pamidanda majeng ring sang mamurug kamargiang olih Prajuru Desa manut atur supeksa saking Pacalang sane kasudi oleh Desa.
- (7) Ngembak Geni, mapiteges panglebaran Bhrata Panyepian, kalih nyanggra pangrauh Isaka Warsa, ritakala punika soang-soang Krama patut nunas pangaksama ring sametonnyane utawi Dharma Santhi.

PANCAMAS SARGAH

SUKERTA TATA PAWONGAN

Palet 1

Indik Pawongan

Pawos 53

- (1) Pawiwahan inggih punika: panunggilan purusa lan pradana malarapan antuk suka cita kadulurin antuk upasaksi sakala niskala.
- (2) Pidabdab pawiwahan sane kepatutang ring Desa Pakraman luire:
 - ha. Pepadikan.
 - na. Ngerorod utawi ngarangkat.
 - ca. Nyeburin.
- (3) Dudonan pepadikan kamargiang ping tiga luire:
 - ha. Pasewakan;
 - na. Pangambilan, kasaksinin olih prajuru tur kacihnayang antuk suaran kulkul.
 - ca. Pangunyane, maduluran pejati katur ka Sanggah utawi ka Mrajan wadone.
- (4) Pamargin ngarorod utawi ngarangkat kapidabdabin sakadi ring sor:
 - ha. Kulawargan lanang patut ngawentenang pasadok, utawi pamalaku antuk duta sanistannya kalih diri tur tan kasepan ring awengi, saha makta suar;
 - na. ngawentenang pangrawos sasampune masengker 3 (tigang) rahina saha maduluran sedah, jambe, gambir seseban, lanjaran, apuh lan tubungan tur madaging sekar matatakan dulang, sane kaantebang olih Jro Mangku;
 - ca. Ngawentenang pasewakan malarapan antuk katipat bantal lan sanganan klandan miwah sakancenipun kasarengin olih kulawarga lanang istri.
 - ra. Daging pasewakan luire:
 1. Kamanggala antuk pangampura arep ring reraman wadone.

2. Ngigumang bawos indik pamargin padewasan pawidi widanannyane.
- ka. Prade kulawargan sang ngarangkat sampun pada ledang, patut rerangkaian punika polih tengeran suaran kulkul.
- da. Prade palakune tan katrima olih kulawarga sang istri, kulawarga lanang kengin nunas pamatut ring prajuru, saha prajuru raris maosin wicara inucap.
- (4) Pawiwahan Nyeburin inggih punika: sane lanang manggeh pinaka pradana, sane istri manggeh pinaka purusa, kabawos sentana rajeg.
- (5) Dudonan pamargi Nyeburin inggih punika: Kulawargan wadone ngamargiang pepadikan majeng ring kulawarga lanang, upakara pawidi-widanan kalaksanayang ring genah sang wadon.
- (6) Prade wenten jadma saking dura Desa ngarorod tur mengkeb ring wawidangan Desa Pakraman, Krama sane nampi patut digelis matur supeksa ring Prajuru. Prajuru pramangkin maritatas kawentenan sang ngrorod. Prade pamargine sampun manut, wenang polih pasayuban, nanging Prade tan manut, tan polih pasayuban.

Pawos 54

Gagwat sang pacang mawiwaha luire:

- ha. Sampun munggah daha truna;
- na. Sangkaning pada lila lan tresna;
- ca. Prade ngambil siyos Agama patut kamanggala antuk banten upacara sudi wadani;
- ra. Mangda nganutin daging Undang-Undang Perkawinan.

Pawos 55

- (1) Pawiwahan sane kabawos puput ring Desa Pakraman Pundukaha Kaja risampune:
- ha. Sampun matengeran suaran kulkul;
- na. Ngamargiang pabeyakalan kasaksiang sakala niskala tur kapuputang antuk Pandita utawi Pinandita;

ca. Wenten upasaksi saking Prajuru Desa;

ra. Sampun kailikitayang.

(2) Pawiwahan sane tan manut ring wiwit (1) nenten kabawos puput.

Pawos 56

(1) Prade wenten sinalih tunggil Krama Desa Pakraman sane kaicalan oka istri, patut ngamargiang paseserep, tur kapidabdabin sakadi ring sor:

ha. Sang pacang maseserep patut masadok rihin, tur nunas panuntun ring Prajuru Desa;

na. Sang pacang maseserep patut nginutin sapituduh Prajuru;

ca. Pacang ngranjing kaumah Krama siyosan tan dados langkungan ring kalih diri;

ra. Tan dados makta sahananing gegawan.

ka. Tan dados maparilaksana lan mabaos sane tan patut.

(2) Prajuru patut midabdabin tur ngenter pamargin sang maseserep. Mangda paseserepe trepti, saha anak istri inucap polih nguningayang pariindikan ipun, pidabdab pamaritatas kamanggehang sakadi ring sor:

ha. Anake istri tinas magenah ring galange, sawatara tigang depa, tan kalugra anak tios nganampekin. Tatujone mangda anake istri tan kemad ngaturang indike ring sang maritatas.

na. Prajuru Desa mratyaksayang pangangken sang istri ritatkala pacang nibakang pamutus. Prade pada arsa sang ngarorod saserepe patut matulak. Prade sangkaning kapaksa wenang sang pacang ngarangkat kapalasang, tur sang lanang kakeninen pamidanda manut Pararem.

(3) Prade masaserep ka Desa Pakraman siyosan patut polih wak-wakan saking prajuru genahe maseserep.

Pawos 57

- (1) Prade wenten anak istri daha mobot, patut kapidabdabin sakadi ring sor:
- ha. Prade sane lanang ngangken madruwe pakardine, tur kari truna kautsahayang mangda prasida mawiwaha;
 - na. Prade sang lanang tan suka ngambil sang istri sane mobot punika, sang lanang patut keni pamidanda manut Pararem. Pamargi salantur ipun katur ring Guru Wisesa. Risampun rarene embas patut kaprateka miwah kaupepira manut Agama olih sang istri;
 - ca. Prade sang lanang sampun madruwe rabi, ngangken madrebe bobotan, tur anake lanang sanggup pacang ngambil sang mobot, pinih rihin patut polih ijin saking rabine sane kapertama tur sampun polih ijin saking Pengadilan Negeri;
 - ra. Prade sang istri sane mobot paling pangangkene tur matujuang anak lanang sane kasenengin, nanging sang katujuang nenten ngangkenin indike punika, patut kamargiang padewa saksi tur prabeyannyane kamedalang olih sang mobot. Risampune rarene embas patut kaupapira olih sang istri manut Agama tur keni pamidanda manut Pararem.
- (2) Sapasira ugi tan kapatutang malaksana sane kabaos mamitra ngalang, drati Krama, paradara lan sapanunggilannya ring wawidangan Desa Pakraman. Sang mamurug keni pamidanda manut Pararem.

Palet 2

Indik Nyapihan

Pawos 58

- (1) Sane kabawos nyapihan inggih punika: sang palas marabiyang sangkaning mawiwit wicara.

- (2) Sapasira ugi Krama sane pacang nyapihan patut polih pamutus saking Pengadilan Negeri, wus punika raris kadambyakang kawentenannya sajeroning paruman.
- (3) Pamargin nyapihan mangda kaanutang ring pidaging Undang-Undang Perkawinan.

Pawos 59

Krama sane nyapihan, kapidabdabin sakadi ring sor:

- ha. Keni pamidanda manut Pararem;
- na. Polih pah-pahan paguna kaya pada satenga utawi manut semayan ipun;
- ca. Pabekelan mawali ndiri-ndiri utawi pasemayan ipun;
- ra. Warisan kakuasayang olih sang kapurusa;
- ka. Patut ngawehin pangupa jiwa lan kaweruhan ring sentanannyane sapatutnya sane wetu ring parabiyannya.

Pawos 61

Prade riwekas sang nyapihan mahcina adung tur arep mawiwaha kapatutang:

- ha. Ngalaksanayang pawiwahan malih manut pamargin pawiwahan ring ajeng;
- na. Keni pamidanda manut Pararem saha kadulurin barten pamrayascita.

Pawos 62

(1) Balu Istri sane katinggal seda olih suaminnyane, utawi balu sane pecak nyeburin patut ngamargiang swadharmaning balu sakadi ring sor:

- ha. Ngamanggehang pati bratha, tan paradara, tan dratikrama;
- na. Ngaraksa, ngutsahayang lan miara sahanan warisan lan pagunakaya kalih sentanannya;
- ca. Tan kengin ngadol, ngadeang, utawi makidihang warisan sawawaning polih panguwak saking kulawarga rabinnyane kapurusa;

- (2) Sapasira ugi Krama sane pacang nyapihan patut polih pamutus saking Pengadilan Negeri, wus punika raris kadambyakang kawentenannya sajeroning paruman.
- (3) Pamargin nyapihan mangda kaanutang ring pidaging Undang-Undang Perkawinan.

Pawos 59

Krama sane nyapihan, kapidabdabin sakadi ring sor:

- ha. Keni pamidanda manut Pararem;
- na. Polih pah-pahan paguna kaya pada satenga utawi manut semayan ipun;
- ca. Pabekelan mawali ndiri-ndiri utawi pasemayan ipun;
- ra. Warisan kakuasayang olih sang kapurusa;
- ka. Patut ngawehin pangupa jiwa lan, kaweruhan ring sentanannyane sapatutnya sane wetu ring parabiyannya.

Pawos 61

Prade riwekas sang nyapihan mahcina adung tur arep mawiwaha kapatutang:

- ha. Ngalaksanayang pawiwahan malih manut pamargin pawiwahan ring ajeng;
- na. Keni pamidanda manut Pararem saha kadulurin barten pamrayascita.

Pawos 62

(1) Balu Istri sane katinggal seda olih suaminnyane, utawi balu sane pecak nyeburin patut ngamargiang swadharmaning balu sakadi ring sor:

- ha. Ngamanggehang pati bratha, tan paradara, tan dratikrama;
- na. Ngaraksa, ngutsahayang lan miara sahanan warisan lan pagunakaya kalih sentanannya:
- ca. Tan kengin ngadol, ngadeang, utawi makidihang warisan sajawaning polih panguwak saking kulawarga rabinnyane kapurusa;

- (2) Balu sane kabaos tan pageh ring swadharmaning balu luire:
 ha. Matingkah dratikrama, paradara, lan sapanunggilannya;
 na. Matilar tan pasadok ngantos langkung ring 6 (nem) sasih;
- (4) Balu sane tan pageh ring swadharma sakadi kecap wiwit (2), prade kacihna manut Tri Pramana (bhukti, ilikita, saksi) salah prawertine, wenang katundung olih kulawargan purusa.

Palet 3

Indik Sentana

Pawos 63

- (1) Sentana wenten kalih pawos luire:
 ha. Praṭi sentana inggih punika: sentana sane metu saking pawiwahan sane kapatut;
 na. Sentana paperasan inggih punika sentana sane kapikolihang antuk ngidih utawi meras kadulurin antuk upasaksi sakala lan niskala saha upacara pamerasan;
- (2) Prade wenten Krama Desa madrebe pianak lanang adiri tan dados kaperas, sang mamurug patut keni pamidanda manut Pararem.
- (3) Meras sentana manut kasujatian manah utawi kayun sang makarsa majalaran manah lulut asih adung sagilik-saguluk, kapungkur ipun jagi natak panes tis ritatkala sampun wreda.

Pawos 64

- (1) Sang pacang meras sentana, patut masadok ring Prajuru sanistannya asasih sadurung pamerasannya tur patut kawentenang pasadu arep ring kulawarga warisnya.
- (2) Bandesa Pakraman digelis patut nambyakang ring Krama sajeroning Paruman indik rencana sang pacang meras sentana.

- (3) Prade wenten miyalangin, mangda digelis nyadokang ring prajuru masengker pinih kasep 21 (selikur) rahina sadurung upacara pamerasan kalaksanayang.
- (4) Bandesa Pakraman digelis maosin saha ngicen panuntun utawi panepas manut catur dresta muah Awig-Awig lan Pararem Desa.
- (5) Prade pidabdjab pacang meras tan kapialang, upacara paperasan inucap wenang kalaksanayang.
- (6) Prade wenten miyalangin manut sulur kecaping ajeng, prajuru wenang ngandeg sang pacang meras saha wenang maweh panuntun mangda wenten wirasa ring sesamannya.
- (7) Meras sentana patut macihna antuk arta brana paperasan, saha kasaksiang olih prajuru, Warga lan waris tur kaungguhang ring ilikita.

Pawos 65

- (1) Sane patut kaperas pinaka sentana madudonan sakadi ring sor:
 - ha. Waris saking kapurusa;
 - na. Saking Warga tunggal sanggah;
 - ca. Saking wadon;
 - ra. Prade tan wenten sakadi munggah ring aksara ha, aksara na mwanng aksara ca, kangkat saking kulawarga siyosan.
- (2) Upacara paperasan patut kasaksinin olih Prajuru, saha kapuputang antuk Sulinggih.
- (3) Sasampune upacara pamerasan puput tur sampun kailikitiyang, Prajuru Desa patut nambyakang indik kawentenannia marep ring Krama Desa sajeroning Paruman.

Pawos 66

- (1) Sapasira ugi pacang ngerobang utawi ngajak jadmaw siyos kulawarga, patut masadok rihin ring Prajuru kadulurin antuk ilikita sane pastika.
- (2) Krama Desa sane ngerobang utawi ngajak patut sumanggup negenang sapari lampah sang kerobang arepe ring kasukertan Desa Pakraman.

- (3) Prajuru Desa ngungguhang pasadok punika ring ilikita saha nambyakang ring sajeroning Paruman Desa.

Pawos 67

- (1) Swadharmaning sang meras sentana pateh sakadi swadharmnaing Guru Rupaka luire:
- ha. Maweh pangupa jiwa;
 - na. Ngupakara saha ngupacara manut Agama;
 - ca. Maweh saha ngutsahayang kaweruhan.
 - ra. Ngupadi karahajengan manut patitis grehasta lan sapanunggilannya.
- (2) Swadharmaning sentana paperasan pateh sakadi swadharmaning prati sentana.
- (3) Prade wenten sinalih tunggil sakadi kasurat ring wiwit (1), lempas ring sesana, patut digelis kasadokang ring Prajuru tur sang malaksana keni pamidanda manut Pararem.

Palet 4

Indik Warisan

Pawos 68

- (1) Warisan inggih punika: sahananing arta brana, saha ayah-ayahan, ngupadi sukerta sakala niskala saking kaluhurannya arep ring turunannya.
- (2) Sane kasinanggeh warisan luire:
- ha. Druwe tanah turun temurun saking kaluhurannya, arta brana, sanggah pamerajan, tanah ayah-ayahan. pusaka lan sakaluiripun;
 - na. Pagunakaya;
 - ca. Utang-piutang.
- (3) Wawu kengin kabawos warisan prade wenten:
- ha. Sang mapiturun kabawos pawaris.
 - na. Katurunannya kabawos ahli waris.

ca. Arta brana miwah tategenan lan ayah-ayahan kabawos warisan.

Pawos 69

(1) Ahli waris luire:

ha. Prati sentana purusa;

na. Prati sentana wadon sane kamanggehang sentana rajeg;

ca. Sentana paperasan.

(2) Prade tan wenten sakadi ucap ring wiwit (1), sane kasinanggeh ahli waris luire:

ha. Papernahan kapurusa ngunggahang minakadi rerama, pekak, rerama dimisan, dimindon lan salanturnyane.

na. Papernahan samping minakadi misan, mindon lan salanturnyane.

Pawos 70

Swadharmaning ahli waris sakadi ring sor:

ha. Muputang upacara Pitra Yadnya pawaris;

na. Ngamargiang sahanan ayah-ayahan pawaris'

ca. Ngawigunayang arta brana warisan;

ra. Ngempon Kahyangan, marajan lan pura tetinggalan pawaris saha ngupakara;

ka. Muputang utang-piutang pawaris.

Pawos 71

(1) Warisan wau dados kaepah olih para ahli waris risampun:

ha. Muputang Pitra Yadnya pawaris.

na. Naurin saluir utang pawaris.

ca. Nyledihi sahanan ayah-ayahan pawaris.

- (2) Prade sajeronig pakulawargan wenten pedum waris patut:
- ha. Kawentenang paigum indik pedum waris inucap.
 - na. Prade tan prasida, kengin nunas pamatut ring Prajuru Desa.
 - ca. Prade taler tan wenten cumpu ring pamutus Prajuru Desa, kengin kalanturang ring Guru Wisesa.
- (3) Sane tan patut polih pah-pahan warisan luire:
- ha. Sentana sane alpaka Guru Rupaka;
 - na. Sentana sane sampun nilar Agama Hindu;
 - ca. Sentana lanang sampun kesah mawiwaha nyeburin.
- (4) Sane kapatut polih pah-pahan warisan pamupon luire:
- ha. Sang mulih daha, mulih Truna riantukan duk pawiwahannya nyeburin.
 - na. Balu istri sane kantun ngamanggehang swadharmaning balu.
- (5) Pawaris duk kantun maurip kengin mapaweweh marep ring okane sane istri sane pacang kesah mawiwaha utawi okane lanang sane pacang nyeburi marupa:
- ha. Jiwadana utawi pabekel tetatadan;
 - na. Paweweh padgatakala;
 - ca. Paweweh warisan siyosan prade sampun kalugra olih ahli waris sane wenten.

SADTAS SARGAH
WICARA LAN PAMIDANDA

Palet 1

Indik Wicara

Pawos 72

- (1) Sane wenang mawosin utawi mutusang wicara ring Desa Pakraman inggih punika Prajuru Desa utawi Kerta Desa.

- (2) Prade wenten wicara tan prasida ngamolihang pamutus ring Desa Pakraman, sang mawicara kengin nunas pamutus ring rumaos utawi Guru Wisesa.

Pawos 73

- (1) Sahananing wicara sane mawit saking laksana corah sane kasinanggeh nungkas ring Awig-Awig utawi Pararem, patut digelis kabaosin olih prajuru tan nyantos pasadok.
- (2) Sajawaning wicara sakadi kecaping ajeng Prajuru wenang maosinri sampune wenten pasadok saking sang nunas baos.
- (3) Panepas saking Prajuru patut pastika nyantenang iwang patut malarapan antuk Tri Pramana luire: saksi, ilikita, bukti, tur taler tan maren nepek ring catur dresta, minakadi: sastra dresta, purwa dresta, loka dresta mwanng Desa dresta.

Palet 2

Indik Pamidanda

Pawos 74

- (1) Desa wenang niwakang pamidanda ring Warga Desa sane sisip.
- (2) Patetiwak pamidanda inucap kamargiang olih Bandesa Pakraman sane ngawidangin.
- (3) Bacakan pamidanda luire:
- ha. Ayahan panukun kasisipan.
 - na. Danda arta marupa dedosan saha panikelania miwah panikel urunan-urunan sane siyosan.
 - ca. Rerampagan.
 - ra. Kadaut tanah ayahannya.
 - ka. Pamidanda siyosan manut Pararem.

- (4) Agung alit pamidanda sane katiwakang manut panglokika kasisipanya.
- (5) Sahanan jinah utawi brana pamidanda, patut karanjingang dados druw Desa.

Pawos 75

- (1) Prade wenten sinalih tunggil Krama langkung ring tigang Paruman utaw
tigang sangkepan mamandal tan naur paturunan utawi dedosan, wenan
karampag.
 - (2) Tata cara nglaksanayang pangrampagan manut sakadi ring sor:
 - ha. Kamanggala antuk pasadok, saking prajuru marep ring sang pacang
karampag.
 - na. Ngrampag kalaksanayang olih prajuru, kasarengin olih Krama
pinakasaksi lan pangrombo pinih akeh 5 (limang) diri.
 - ca. Sang ngrampag mangda sangkaning darsana ngambil barang utawi tanem
tuuh akehnia manut agung alit utang sang karampag.
 - ra. Sahananing sane karampag patut kaunggahang ring ilikita tur kasaksiang.
 - ka. Prajru patut miteketin sang karampag mangda digelis nebus sadurung
waneng asasih.
 - da. Lelangan barang sane karampag kaanggen nuku utangnia ring Banjar
utawi Desa tur kawewehin antuk prabea pangrampagan, sisanya
kawaliang ring sang karampag.
 - (3) Tan kawenangan ngrampag barang sane kainggilang manut Agama miwah
sane mademiang pangupajiwana sang karampag.
 - (4) Pamidanda sakadi ring ajeng pastika purna buntas, Prade sang sisip sampun:
 - ha. Nunas geng sinampura ring Krama sajeroning Paruman, riantukan purun
ngauk pasubaya.
 - na. Naur pamidanda panguak pasuara duk pacang karampag.

SAPTAMAS SARGAH NGUWAH-NGUWUHIN AWIG-AWIG

Pawos 76

- (1) Nguwah-nguwuhin Awig-Awig puniki kalaksanayang olih Paruman Des Pakraman.
- (2) Paruman inucap patut kadasarin antuk sagilik-saguluk, paigum, Pararem Krama Desa.
- (3) Pamutus bebaosan prasida kamanggehang prade sampun madasar antuk kayun sagilik-saguluk. Utawi madasar antuk pawilangan suara prade tan sida sagilik-saguluk.
- (4) Prade pamutuse madasar antuk wilangan suara, gaguatnia patut sakadi ring sor:
 - ha. Katah Krama sane Parum kalih pah tiga saking paiguman Desane sami.
 - na. Pawilangan suara sane nganutin satenga langkung adiri saking katah Krama sane Parum.

Pawos 77

Rencana Paruman indik pacang nguwah-nguwuhin Awig-Awig kamedalang olih Prajuru.

ASTAMAS SARGAH

SAMAPTA

Pawos 78

- (1) Awig-Awig puniki kawastanin Awig-Awig Desa Pakraman Pundukaha Kaja.
- (2) Awig-Awig puniki manggeh kalaksanayang ring wawidangan Desa Pakraman Pundukaha Kaja.
- (3) Awig-Awig puniki kamargiang saking kararemin antuk Desa Pakraman Pundukaha Kaja.
- (4) Awig-Awig ngeninin sahananing Warga lian Krama desa, miwah sakaluiring sane kakuub antuk Desa Pakraman Pundukaha Kaja.

Pawos 79

- (1) Sakaluring pamargin sane wenten sadurungnia patut kaanutang ring sadaging Awig-Awig puniki.
- (2) Pamargin Pakraman sane durung kabawos sajeroning Awig-Awig puniki, manggeh kalaksanayang manut Tata cara sane sampun ketah mamargi, kadulurin antuk Pararem Desa.

Pawos 80

- (1) Awig-Awig puniki kararemin sajeroning Paruman Desa Pakraman Pundukaha Kaja duk rahina Saniscara Kliwon Krulut, titi tanggal 2, Sasih Sadha, rah 3, tenggek 2, Waka 1935 tanggal Masehi 11 Mei 2013.
- (2) Awig-Awig puniki kalingga tanganin olih para Kelihan Tempek, Prajuru Desa Pakraman Kelihan Banjar Dinas Pundukaha Kaja saha kasaksinin olih para Manggala Praja minakadi: Perbekel Desa Bunga Mekar, Camat Nusa Penida, pamekas Bupati Klungkung maka Murda pamikukuh.

(3) Luir sang nglingatanganin:

ha. Prajuru Desa Pakraman Pundukaha Kaja;

Bandesa Pakraman



Ketut Adnyana

Penyarikan



I Wayan Krura, S.Pd


na. Saksi-saksi para Kelihan Tempekan:

Tempekan Kanginan



I Wayan Sugania

Tempekan Nyuhungan




I Wayan Rusada

ca. Saksi Kelian Banjar Dinas

Kelian Banjar Dinas



ra. Para Manggala Praja Dinas



NIP: 19631226 198603 1011

ka. Bupati Klungkung maka murdaning pamikukuh

Telah dicatatkan : *di PRATIWI HUKUM, HAN DWI OREANJENI*

Reg. Nomor : *189/6/H20/2013*

Tanggal : *28 AGUSTUS 2013*

Mengetahui,



Lampiran

PANITIA PANYURATAN RANCANGAN AWIG-AWIG DESA PAKRAMAN PUNDUKAHA KAJA

Penasehat :

1. Majelis Alit Desa Pakraman Kecamatan Nusa Penida
2. Prebekel Desa Bunga Mekar.
3. Kelihan Banjar Dinas Pundukaha Kaja.

Penanggung jawab : I Made Lastrawan.

Ketua : I Wayan Karya

Wakil Ketua : I Ketut Adnyana

Sekretaris : I Putu Winasa

Bendahara : I Wayan Narja

Baga-baga:

- a. Parahyangan : I Ketut Puntara
- b. Pawongan : I Ketut Krana
- c. Palemahan : I Ketut Yarma